



Broj: 05-02-1-1820/14
Sarajevo, 16.7.2014. godine



PARLAMENTARNA SKUPŠTINA BiH

- *Zastupnički dom* -
- *Dom naroda* -

PRIMLJENO	17-07-2014	Broj
Podnosi	0102-02-1-	priloga
broj	30	19

B

SARAJEVO

PREDMET: Prijedlog zakona o izmjenama i dopunama
Zakona o politici direktnih stranih ulaganja u BiH

Vijeće ministara Bosne i Hercegovine, na 102. sjednici održanoj 25.6.2014. godine, utvrdilo je Prijedlog zakona o izmjenama i dopunama Zakona o politici direktnih stranih ulaganja u Bosnu i Hercegovinu, te zaključilo da se isti uputi Parlamentarnoj skupštini Bosne i Hercegovine uz prijedlog da se razmatra po temeljnom zakonodavnom postupku.

U svezi s navedenim, u privitku dostavljamo Prijedlog zakona o izmjenama i dopunama Zakona o o politici direktnih stranih ulaganja u Bosnu i Hercegovinu, na bosanskom, hrvatskom i srpskom jeziku. Istodobno dostavljamo Pregled odredbi Zakona koje se mijenjaju i dopunjavaju, kao i elektronsku verziju Prijedloga zakona.

S poštovanjem,

GENERALNI TAJNIK
Zvonimir Kutleša

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine, na __. sjednici Predstavničkog doma, održanoj ____ 20__ . godine i na __. sjednici Doma naroda, održanoj ____ 20__ . godine, usvojila je

**Zakon o izmjenama i dopunama
Zakona o politici direktnih stranih ulaganja u Bosni i Hercegovini**

Član 1.

U Zakonu o politici direktnih stranih ulaganja u Bosni i Hercegovini („Službeni glasnik BiH“, br. 17/98, 13/03 i 48/10), u članu 2., u izrazu „Rezident Bosne i Hercegovine“, iza riječi „entiteta“ dodaju se riječi: „ili Brčko Distrikta Bosne i Hercegovine“.

Izraz: „Javno informiranje:“ mijenja se u izraz: „Medijski poslovi:“ i glasi:
„Medijski poslovi:“ znače poslovi emitiranja radijskog programa i emitiranja televizijskog programa putem zemaljske radiodifuzije.“.

Poslije izraza: „Medijski poslovi“ dodaje se novi izraz : „Poslovni subjekt“ i glasi:

„Poslovni subjekt“: znači bilo koje domaće privredno društvo ili ustanova u koju je strani ulagač izvršio direktno strano ulaganje, uključujući i proširenje dijela ili cjeline domaćeg privrednog društva ili ustanove.“.

Član 2.

U članu 3. iza riječi: „Bosne i Hercegovine“ se brišu riječi: „i to“, a iza riječi „entiteta“ dodaju se riječi: „i Brčko Distrikta Bosne i Hercegovine“.

Član 3.

U članu 4. stav (a) mijenja se i glasi:

„(a) Bez obzira na politiku slobodnih direktnih stranih ulaganja u Bosni i Hercegovini utvrđenih u članu 3. ovog Zakona, strani ulog u osnovnom kapitalu nekog poslovnog subjekta koje se bavi proizvodnjom i prodajom oružja, municije, eksploziva za vojnu upotrebu, vojne opreme i medijskim poslovima neće preći 49% osnovnog kapitala u tom poslovnom subjektu.“.

U stavu (b) riječ „saglasnost“ zamjenjuje se riječju „odobrenje“.

Stav (f) mijenja se i glasi:

„(f) Vlada entiteta može donijeti odluku, ukoliko ocijeni opravdanim, da ulog stranog lica kod određenih privrednih društava iz stava (a) ovog člana, ne podliježe restrikciji navedenoj u stavu (a) ovog člana, a sve u skladu s propisima kojim su regulirane ove oblasti.“.

Član 4.

U članu 8. stav (a) riječi: „i sa zakonima entiteta“ zamjenjuju se riječima: „te sa zakonima entiteta i Brčko Distrikta Bosne i Hercegovine“.

U stavu (b) riječi: „Bosna i Hercegovina i entiteti“ zamjenjuju se riječima: „Bosna i Hercegovina, entiteti i Brčko Distrikt Bosne i Hercegovine“.

Član 5.

U članu 9. stav (a) mijenja se i glasi:

„(a) Oporezivanje poslovnih subjekata iz ovog Zakona obavljat će se u skladu s poreskim zakonodavstvom Bosne i Hercegovine, entiteta i Brčko Distrikta Bosne i Hercegovine.“.

St. (b) i (c) se brišu.

Član 6.

Član 10. mijenja se i glasi:

„Član 10.

Direktno strano ulaganje će biti izuzeto od plaćanja carina i carinskih obaveza, ukoliko drugačije nije predviđeno odredbama Zakona o carinskoj politici Bosne i Hercegovine. („Službeni glasnik BiH“, br. 57/04, 51/06, 93/08, 54/10 i 76/11).“.

Član 7.

U članu 11. stav (d) mijenja se i glasi:

„(d) Transakcije iz st. (a), (b) i (c) ovog člana u inostranstvo vrše se putem komercijalnih banaka po ispunjenju svih poreznih i drugih zakonom propisanih obaveza po osnovu javnih prihoda u Bosni i Hercegovini.“.

Član 8.

U članu 17. riječi: „dogovore o nekoj drugoj proceduri“, zamjenjuju se riječima: „ugovore neku drugu proceduru“.

Član 9.

U članu 19. stav (b) se briše.

Član 10.

U članu 22. iza riječi „entiteti“ dodaju se riječi: „i Brčko Distrikt Bosne i Hercegovine“.

Član 11.

U članu 23. riječi: „Bosna i Hercegovina i entiteti“ zamjenjuju se rječima: „Bosna i Hercegovina, entiteti i Brčko Distrikt Bosne i Hercegovine“.

Član 12.

Ovaj Zakon stupa na snagu osmog dana od dana objavljivanja u „Službenom glasniku BiH“.

PSBiH, broj ____/____
____ 20 ____ . godine
Sarajevo

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

O b r a z l o ž e n j e

I - Pravni osnov

Pravni osnov za donošenje ovog Zakona sadržan je u članu IV. 4. a) Ustava Bosne i Hercegovine, kao i odredbama člana III 1. b) Ustava Bosne i Hercegovine, prema kojem su nadležnosti institucija Bosne i Hercegovine i poslovi vanjskotrgovinske politike, u koje spada unaprjeđenje stranih investicija u BiH.

II - Razlozi za donošenje Zakona

Vijeće ministara Bosne i Hercegovine je na 57. sjednici, održanoj 17.07.2013. godine, razmotrilo i usvojilo Informaciju u vezi s realizacijom aktivnosti u okviru Projekta poboljšanja poslovnog okruženja i jačanja konkurentnosti i trgovinske logistike u Bosni i Hercegovini, o čemu je obavijestilo ovo Ministarstvo radi njegove provedbe. U sklopu pomenute Informacije usvojen je i Izvještaj o procjeni uticaja regulative na Zakon o politici direktnih stranih ulaganja u Bosni i Hercegovini, s Opcijom 2 Općeg cilja - Izmjene i dopune Zakona o politici direktnih stranih ulaganja u BiH.

Donošenjem Zakona o izmjenama i dopunama Zakona o politici DSU u BiH s jasnim i preciznim odredbama stvorila bi se veća pravna sigurnost, unaprijedio i pojednostavio proces priliva direktnih stranih ulaganja i poboljšalo poslovno okruženje i investicijska klima. Izmjene i dopune Zakona u skladu s novim, modernim rješenjima bi pomogle u otklanjanju barijera u poslovanju javnog i privatnog sektora. Ovim bi se poslala jasna poruka investitorima da je BiH opredijeljena za privlačenje novih investicija i za zadržavanje i proširenje postojećih investicija u zemlji, stvaranje novih radnih mjesta i jačanje održivog ekonomskog razvoja u zemlji. Također, Bosna i Hercegovina bi imala Zakon o politici direktnih stranih ulaganja s izmjenama i dopunama odredbi koje uređuju ključne oblasti ažuriranim u skladu s najboljim praksama koji bi doprinio boljem imidžu zemlje i jačanju konkurentnosti.

III - Obrazloženje predloženih rješenja

Član 1.

U članu 2. ovog Zakona, izrazu rezident Bosne i Hercegovine dodaje se i Brčko Distrikt BiH. Zatim je predložena izmjena izraza „javno informiranje“ u izraz „medijski poslovi“ i data definicija ovog izraza. Izmjena je bila neophodna jer su postojeći izraz i njegovo značenje preširoki i ne definiraju poslovni sektor, koji podliježe restrikcijama. „Medijski poslovi“ znače poslovi emitiranja radijskog programa i emitiranja televizijskog programa putem zemaljske radiodifuzije“. Definicija izraza „medijski poslova“ se suzila samo na emitiranje radijskog i televizijskog programa putem zemaljske radiodifuzije, koje podrazumijevaju korištenje frekvencija kao javnog dobra (javni emiteri). „Medijski poslovi“ se stavljaju pod isti tretman kao i namjenska proizvodnja, na način da se ograničenje zadržava za javne informativne servise, a za ostale medijske poslove nije potrebno ograničenje. Ovakvom

formulacijom izraza „medijskih poslova“ izbjeglo se da strani investitori imaju većinsku kontrolu nad domaćim javnim servisima – BHRT, FTV ili RTRS.

U ovom članu se također uvodi novi izraz „poslovni subjekt“, koji zamjenjuje dosadašnji izraz „preduzeće“, koji je napušten i u Zakonu o privrednim društvima F BiH i ima značenje privrednog društva. “Poslovni subjekt“ znači bilo koje domaće privredno društvo ili ustanova u koju je strani ulagač izvršio direktno strano ulaganje, uključujući i proširenje dijela ili cjeline domaćeg privrednog društva ili ustanove. Prema Zakonu o politici direktnih stranih ulaganja BiH, ulaganje se može vršiti i u ustanove, a one se bave neprivrednim djelatnostima.

Član 2. ovog Zakona koncipiran je tako da se u njemu navedeni izrazi koriste samo u smislu Zakona o politici direktnih stranih ulaganja u BiH.

Član 2.

Izvršena je dopuna člana 3. Zakona, kojom je obuhvaćen i Brčko Distrikt BiH, a imajući u vidu da osnovni Zakon o politici direktnih stranih ulaganja u BiH datira iz 1998. godine, prije nastanka Brčko Distrikta. Prethodne dvije izmjene (2003. i 2010. godine), koje su izvršene nakon formiranja Brčko Distrikta, bazirale su se samo na uklanjanju administrativnih barijera.

Član 3.

Izvršena je terminološka izmjena u članu 4., kojom se riječ „glavnica“ zamjenjuje riječima „osnovni kapital“, radi usklađivanja sa Zakonom o privrednim društvima, a riječi „javno informiranje“ zamjenjuju riječima „medijskim poslovima“, i riječ „preduzeću“ zamjenjuje se riječima „poslovnom subjektu“, u skladu s članom 1. ovog Zakona.

Izvršena je i izmjena riječi „saglasnost“ u „odobrenje“ u cilju usklađivanja državnog i entitetskih zakona, jer se izraz „odobrenje“ koristi u entitetskim zakonima.

U stavu (f) izvršeno je brisanje riječi „osim preduzeća koja se bave javnim informiranjem“, a na kraju ovog stava iza riječi „ovog člana“ dodaju se riječi: „a sve u skladu sa propisima kojim su regulirane ove oblasti“.

Na ovaj način “medijski poslovi” se stavljaju pod isti tretman kao i namjenska proizvodnja, vrši se liberalizacija u smislu otvaranja mogućnosti za ulaganja preko 49% od ukupnog kapitala u društva koja se bave medijskim poslovima, uz poštivanje propisa koji su lex specialis za ovu oblast.

Član 4.

Izvršena je dopuna u članu 8., kojom je obuhvaćen i Brčko Distrikt BiH.

Član 5.

Izvršena je izmjena u članu 9. stav (a), kojom su riječi „stranih ulagača i direktnih stranih ulaganja“, zamjenjene riječima „poslovnih subjekata iz ovog Zakona“.

U ovom stavu izvršena je i dopuna, kojom je obuhvaćen i Brčko Distrikt BiH, imajući u vidu da je u Brčko Distriktu BiH na snazi zaseban Zakon o porezu na dobit BD BiH, Zakon o porezu na dohodak BD BiH i Odluka o stopi doprinosa za zapošljavanje kao i Odluka o osnovici i stopi za zdravstveno osiguranje.

Stavovi (b) i (c) ovog člana su brisani, jer su neposredni (direktni) porezi u Bosni i Hercegovini, regulirani na entitetskom nivou.

Član 6.

Izvršena je izmjena u članu 10., u skladu s najboljim praksama, da se u zakonu o stranim ulaganjima poziva na primjenjivo, konkretno zakonodavstvo o carinskim obavezama države. Carinske obaveze su državno pitanje, te su stoga uređene zakonodavstvom na državnom, a ne entitetskom nivou. Pozivanje na plaćanje naknade za carinsko evidentiranje ne treba biti uvršteno u zakon, obzirom da je ovo administrativna naknada koja je obuhvaćena u Zakonu o carinskoj politici i mora biti plaćena od strane podnositelja.

Član 7.

Izvršena je izmjena člana 11. stav (d), s ciljem preciziranja obaveza stranih ulagača koje bi trebao izmiriti prije obavljanja predmetnih transakcija.

Član 8.

Izvršena je izmjena u članu 17. kojom se riječi „dogovore o nekoj drugoj proceduri“ zamjenjuje riječima „ugovore neku drugu proceduru“.

Ova izmjena je izvršena iz razloga što u našem zakonodavstvu postupak za rješavanje sporova putem arbitraže ili medijacije mora biti izričito ugovoren, što je propisano članom 434. Zakona o parničnom postupku BiH, odnosno članom 10. Zakona o postupku medijacije BiH.

Član 9.

Izvršena je izmjena u članu 19., u kome se stav (b) briše.

Prema najboljoj praksi ne treba tražiti zaštitu postojećeg stanja kada nema ugovora između vlade i stranog ulagača u pogledu ulaganja. Strani ulagači ne očekuju takvu zaštitu kada nema ugovora između vlade i stranog ulagača. Ukoliko bi takva zaštita bila ponuđena stranim

ulagačima, organi vlade koji primjenjuju zakone imali bi velike poteškoće kod odlučivanja koja verzija zakona se primjenjuje na kojeg stranog ulagača.

Član 10.

Izvršena je dopuna člana 22., kojom je obuhvaćen i Brčko Distrikt BiH.

Član 11.

Izvršena je izmjena člana 23., kojom je obuhvaćen i Brčko Distrikt BiH.

Član 12.

Stupanje na snagu i objava u službenim glasilima.

IV – Finansijska sredstva

Provođenje Zakona o izmjenama i dopunama Zakona o politici direktnih strnih ulaganja u Bosnu i Hercegovinu ne zahtijeva posebna sredstva iz budžeta institucija Bosne i Hercegovine.

PREGLED ODREDBI ZAKONA O POLITICI DIREKTNIH STRANIH ULAGANJA U BOSNI I HERCEGOVINI KOJE SE MIJENJAJU

Zakonom o izmjenama i dopunama Zakona o politici direktnih stranih ulaganja u Bosni i Hercegovini izvršna je izmjena sledećih članova u Zakonu o politici direktnih stranih ulaganja u Bosni i Hercegovini („Službeni glasnik BiH“, br. 17/98, 13/03 i 48/10), kako slijedi:

U članu 2. Zakona kojim je definisano značenje upotrijebljenih izraza izvršena je izmjena sledećih izraza i, i to:

- **Postojeća definicija izraza „Rezident Bosne i Hercegovine“:** „znači fizičko lice koje ima prebivalište ili boravište u Bosni i Hercegovini, zaposleno ili samostalno radi ili ima svoj centar ekonomskog interesa u Bosni i Hercegovini, ili neko pravno lice konstituisano po zakonima Bosne i Hercegovine ili entiteta i koje ima registrovano sjedište, centralnu upravu ili glavno mjesto poslovanja u Bosni i Hercegovini“, *dopunjena je na način da je iza riječi entiteta izvršeno dodavanje riječi „ili Brčko Distrikta BiH“, te dopunjena definicija „Rezident Bosne i Hercegovine“ glasi: znači fizičko lice koje ima prebivalište ili boravište u Bosni i Hercegovini, zaposleno ili samostalno radi ili ima svoj centar ekonomskog interesa u Bosni i Hercegovini, ili neko pravno lice konstituisano po zakonima Bosne i Hercegovine, entiteta ili Brčko Distrikta BiH i koje ima registrovano sjedište, centralnu upravu ili glavno mjesto poslovanja u Bosni i Hercegovini“.*

- **Postojeća definicija izraza „Javno informisanje“:** „znači informiranje koje se ostvaruje posredstvom medija. Mediji su novine i druga štampa, radijski i televizijski programi, programi novinskih agencija, elektronske publikacije, teletext, ostali oblici dnevnog i li periodičnog objavljivanja urednički oblikovanih programskih sadržaja prijenosom zapisa, glasa, zvuka ili slike“, *promijenjen je u izraz „medijski poslovi“ i data definicija ovog izraza, koja glasi: „Medijski poslovi“ znače poslovi emitiranja radijskog programa i emitiranja televizijskog programa putem zemaljske radiodifuzije“.*

- **Poslije izraza: „Medijski poslovi“ dodaje se novi izraz : „Poslovni subjekt“ i glasi:**
„Poslovni subjekt“ znači bilo koje domaće privredno društvo ili ustanova u koju je strani ulagač izvršio direktno strano ulaganje, uključujući i proširenje dijela ili cjeline domaćeg privrednog društva ili ustanove“.

-Član 3. koji glasi: „Ukoliko ovim zakonom nije drugačije predviđeno, strani ulagač ima pravo da investira, reinvestira dobit iz takvih ulaganja u bilo koji i sve sektore privrede Bosne i Hercegovine, i to u istom obliku i pod istim uslovima definisanim za rezidente Bosne i Hercegovine i važećim zakonima i propisima Bosne i Hercegovine i Entiteta“, *dopuže se tako što se iza riječi „Entiteta“ dodaju riječi: „Brčko Distrikta BiH“- dopunjen je i glasi: „Ukoliko ovim zakonom nije drugačije predviđeno, strani ulagač ima pravo da investira, reinvestira dobit iz takvih ulaganja u bilo koji i sve sektore privrede Bosne i Hercegovine, i to u istom obliku i pod istim uslovima definisanim za rezidente Bosne i Hercegovine i važećim zakonima i propisima Bosne i Hercegovine, Entiteta i Brčko Distrikta BiH“.*

U članu 4. stav (a)- „Bez obzira na politiku slobodnih direktnih stranih ulaganja u Bosni i Hercegovini utvrđenu u članu 3. ovog zakona, strani ulog u glavnicu nekog preduzeća koje se bavi proizvodnjom i prodajom oružja, municije, eksploziva za vojnu upotrebu, vojne opreme te javnim informisanjem neće preći 49% od glavnice u tom preduzeću“- *izvršene su terminološke izmjene i stava a) ovog člana glasi: „Bez obzira na politiku slobodnih direktnih stranih ulaganja u Bosni i Hercegovini utvrđenu u članu 3. ovog zakona, strani ulog u osnovnom kapitalu nekog poslovnog subjekta koji se bavi proizvodnjom i prodajom oružja, municije, eksploziva za vojnu upotrebu, vojne opreme te medijskim poslovima neće preći 49% od glavnice u tom poslovnom subjektu.“*

Stav (b) člana 4.- „U slučaju ulaganja u sektore koji podliježu restrikcijama na koje se poziva u stavu (a) ovog člana, strani ulagači moraju dobiti prethodnu saglasnost od nadležnog organa u odgovarajućem Entitetu.“, *izmijenjen je u smislu da se riječ „saglasnost“ zamjenjuje se riječima „odobrenje“, nakon čega član 4. stav b) glasi: „U slučaju ulaganja u sektore koji podliježu restrikcijama na koje se poziva u stavu (a) ovog člana, strani ulagači moraju dobiti prethodno odobrenje od nadležnog organa u odgovarajućem Entitetu.“*

U stavu (f) člana 4.- „Vlada entiteta može donijeti odluku, ukoliko ocijeni opravdanim, da ulog stranog lica kod određenih privrednih društava iz stava a) ovog člana, osim preduzeća koja se bave javnim informisanjem, ne podliježe restrikciji navedenoj u stavu a) ovog člana“, -*izvršeno je brisanje riječi „osim preduzeća koja se bave javnim informisanjem“, a na kraju ovog stava iza riječi „ovog člana“ dodaju se riječi: „a sve u skladu sa sa propismia kojim su regulisane ove oblasti“, nakon čega stav f) ovog člana glasi: „Vlada entiteta može donijeti odluku, ukoliko ocijeni opravdanim, da ulog stranog lica kod određenih privrednih društava iz stava a) ovog člana, ne podliježe restrikciji navedenoj u stavu a) ovog člana a sve u skladu sa sa propismia kojim su regulisane ove oblasti“.*

Član 8. stav (a) - „U skladu sa odredbama ovog zakona, drugih zakona i sporazuma Bosne i Hercegovine i sa zakonima Entiteta, strani ulagači imaju ista prava i obaveze kao i rezidenti Bosne i Hercegovine“, *izmijenjen je u smislu da su riječi: „i sa zakonima Entiteta“ zamjenjene riječima: „te sa zakonima Entiteta i Brčko Distrikta Bosne i Hercegovine“.*

nakon čega stav a) ovog člana glasi: „U skladu sa odredbama ovog zakona, drugih zakona i sporazuma Bosne i Hercegovine, te sa zakonima Entiteta i zakonima Brčko Distrikta BiH, strani ulagači imaju ista prava i obaveze kao i rezidenti Bosne i Hercegovine.“.

Član 8. stav (b)- „Bosna i Hercegovina i Entiteti neće vršiti diskriminaciju stranih ulagača u bilo kom obliku, uključujući ali ne i ograničavajući se na njihovo državljanstvo, sjedište odnosno boravište, religiju ili državu porijekla investicija“- *izmijenjen je u smislu da su se riječi: „Bosna i Hercegovina i Entiteti“ zamjenili riječima: „Bosna i Hercegovina, Entiteti i Brčko Distrikt Bosne i Hercegovine“, nakon čega stav b) ovog člana glasi: „Bosna i Hercegovina, Entiteti i Brčko Distrikt Bosne i Hercegovine neće vršiti diskriminaciju stranih ulagača u bilo kom obliku, uključujući ali ne i ograničavajući se na njihovo državljanstvo, sjedište odnosno boravište, religiju ili državu porijekla investicija.“.*

U članu 9. stav (a) - „Oporezivanje stranih ulagača i direktnih stranih ulaganja obavljaće se u skladu sa poreskim zakonodavstvom Entiteta“ - *izmijenjen je su smislu da su riječi „stranih ulagača i direktnih stranih ulaganja“, zamjenjene su riječima „poslovnih subjekata iz ovog zakona“, i izvršena dopuna, kojom je obuhvaćen i Brčko Distrikt BiH, nakon čega preformulisan stav a) ovog člana glasi: „(a) Oporezivanje poslovnih subjekata iz ovog zakona obavljati će se u skladu sa poreskim zakonodavstvom Bosne i Hercegovine, Entiteta i Brčko Distrikta Bosne i Hercegovine.“.*

Stavovi (b) i (c) člana 9. su brisani, a glasili su:

(b) Da bi potakli strana ulaganja, Entiteti će osigurati da poresko zakonodavstvo iz stava (a) ovog člana sadrži odlike i stope koje su privlačne za stranog ulagača. Entiteti će s vremena na vrijeme zajednički vršiti pregled poreskog zakonodavstva da bi ono zadržalo privlačnost.

(c) Poreski režimi u dva Entiteta će se rukovoditi sljedećim načelima:

(i) Režimi oporezivanja poduzetništva neće vršiti diskriminaciju stranih i domaćih ulagača; i
(ii) Entiteti prihvataju da je nepoželjna konkurencija u odobravanju olakšica i obavezuju se da izbjegavaju takvu konkurenciju.

Član 10. - „Strana ulaganja će biti izuzeta od plaćanja carina i carinskih obaveza, isključujući carinsko evidentiranje ukoliko drugačije nije predviđeno odredbama Zakona o carinskoj politici Bosne i Hercegovine“ - *izmijenjen je i glasi: „Direktno strano ulaganje će biti izuzeto od plaćanja carina i carinskih obaveza, ukoliko drugačije nije predviđeno odredbama Zakona o carinskoj politici Bosne i Hercegovine („Službeni glasnik BiH“, br. 57/04, 51/06, 93/08, 54/10 i 76/11).“*

Član 11. stav (d) - „Sve transakcije vršice se u skladu sa zakonima Bosne i Hercegovine“ - *izmijenjen je u cijelosti i glasi: „(d) Transakcije iz prethodnih stavova ovog člana u inostranstvo vrše se putem komercijalnih banaka po ispunjenju svih poreznih i drugih zakonom propisanih obaveza po osnovu javnih prihoda u Bosni i Hercegovini.“*

Član 17. - „Sporovi vezani za strana ulaganja rješavaće se u nadležnim sudovima u Bosni i Hercegovini, osim ako se zainteresovane strane ne dogovore o nekoj drugoj proceduri kojom će se ti sporovi rješavati, uključujući ali ne ograničavajući se na domaće ili međunarodno mirenje ili arbitražu“ - *izmijenjen je u smislu da su riječi „dogovore o nekoj drugoj proceduri“ zamjenjene riječima „ugovore neku drugu proceduru“, nakon čega predloženi član 7. glasi: „Sporovi vezani za strana ulaganja rješavaće se u nadležnim sudovima u Bosni i Hercegovini, osim ako zainteresovane strane ne ugovore neku drugu proceduru kojom će se ti sporovi rješavati, uključujući ali ne ograničavajući se na domaće ili međunarodno mirenje ili arbitražu“.*

U članu 19. - stav (b) je brisan, a glasio je:

(b) Bez obzira na odredbu iz stava (a) ovoga člana, postojeći strani ulagač može u pisanoj formi da obavijesti nadležni organ u odgovarajućem Entitetu u roku od (120) dana nakon stupanja ovoga zakona na snagu da želi da se na njega primjenjuju odredbe ovoga zakona.

Član 22. - „Entiteti su odgovorni svaki na svojoj teritoriji za provedbu ovog zakona“ - *izmijenjen je u smilu da je iz iza riječi Entiteti izvršeno dadavanje riječi „i Brčko Distrikt Bosne i Hercegovine“, nakon čega predloženi član 22. glasi: „Entiteti i Brčko Distrikt Bosne i Hercegovine su odgovorni svaki na svojoj teritoriji za provedbu ovog zakona“.*

Član 23. - „Bosna i Hercegovina i Entiteti moraju u potpunosti sarađivati da bi se ostvarili ciljevi politike utvrđeni ovim zakonom i poduzimati sve mjere da obezbijede ispunjenje obaveza koje proizilaze iz ovog zakona“ - *zamijenjen je na način da se riječi “Bosna i Hercegovina i Entiteti” zamjenjuju riječima: „Bosna i Hercegovina, Entiteti i Brčko Distrikt Bosne i Hercegovine“, nakon čega predloženi član 23. glasi: „Bosna i Hercegovina, Entiteti i Brčko Distrikt Bosne i Hercegovine moraju u potpunosti sarađivati da bi se ostvarili ciljevi politike utvrđeni ovim zakonom i poduzimati sve mjere da obezbijede ispunjenje obaveza koje proizilaze iz ovog zakona“.*